



洛陽九老祖龍學文集卷之十五

家集

紫微祖士衡字平叔撰呼延告詞加食邑乾興元年

三月

翊衛雄勇功臣捧日左第三軍都指揮使銀青光祿大夫檢校工部尚書使持節高州諸軍事高州刺史御史大夫輕車都尉永安郡開國侯食邑一千一百戶呼延必顯

朕奉憑几之訓言肇登宸極眷執戈之營衛特奉徽章庶使勞臣有以加勸惟爾名登勇爵志達善經然御衆之材蔚有訓戒之效入奉周廬之警出嚴豹服之容純

誠可嘉茂渥宜及增其秩品進以爰田勉報朝榮惟忠
與孝可特授檢校禮部尚書使持節高州諸軍事高州
刺史兼御史大夫依舊捧日左第三軍都指揮使加食
邑三百戶食寔封一百戶功臣散官勲封如故

大宗故推忠協謀守正佐理功臣開府儀同三
司行尚書左僕射兼門下侍郎同中書門下平
章事充玉清昭應宮使昭文館大學士監修國
史上柱國河內郡開國公食邑一萬二千七百
戶食實封五千一百戶賜太師謚曰文簡向公
神道碑銘

朝請大夫尚書禮部郎中上護軍范陽縣開

國伯食邑七百戶賜紫金魚袋臣祖士衡奉

勅撰士衡乃文簡之孫壻也所以知文簡之詳

臣聞麗高穹者萬象而斗魁制其中高宗廟諱廣廈者家材

而棟梁任其大民惟后而斯戴后非臣而罔入天地裁

成之日一二萬幾聖賢會遇之期旦暮十載若乃自天

生德乘時奮庸守正以持平宣獻以敷制切廟當世之

務嘉靖有邦之正便藩惟辰繫丙魏之同心照爛簡編

與閑散而爭烈者其惟元宰河內公乎公諱敏中字常

之其先宗左師之裔也後世徙居大梁子孫因家焉魯

祖萊國公諱貽孫祖許國公諱載烈考曹國公諱禹皆

贈開府儀同三司太師尚書令兼中書令而國之命凡

五遷馬密印泥書輝映里門曾祖妣張夫人祖妣孫夫人妣史夫人以韓魏韓三國申追封之典善慶之來斯遠哀榮之數惠及曾祖而下皆感槩世故優游天爵諸侯不得友萬物莫能遷鄉里稱為善人子孫宜有達者而先曾公菀局闕廓志行潔修好聚圖書多交賢俊位匪充量福成有基公生協貴祥切懷夙智山庭月角特稟于竒姿天球河圖居然于重菀始就外傳文藻日新先令君治家尚嚴知子為美嘗謂史夫人曰大吾門者吾兒也勿漏吾言恐隳其志寓居近市過往踵門有若儒生適至傍舍公風骨觀視正行遲因與鄰母言稱有宰相之器俄失所在斯足異焉繼喪二親善居得禮比

至除變四壁蕭然載逾加官之年始赴命鄉之舉太平興國五年太宗親御便坐公以進士高等面賜登科一命將作監丞同判吉州郊祀之慶遷太子右贊善大夫故司空致仕張齊賢時司外計囑公治獄璽書褒之九年代還遷著作郎覲見之日奏事稱旨選于三司戶部判官賜五品服未幾為淮南轉運副使前此涖職率尚剛決析毫定制破柱求姦公獨不然取一警百甄明吏課勤恤民隱屬有言公况雄多大畧可備文武之用者驛召且將至以八作使之處非所好也懇辭得免翌日繕寫畢生筆述獻于公車亟一牘以回觀因每篇而稱善得直史館遣還治所耕藉息超遷左司諫入為戶部

判官明年以本官知制誥賜紫當是時也堯日光華安
安為德周家忠厚郁成風疇咨之命亟行潤色之文
尤重公以儻望躋于禁垣發揮大哉之言裁成坦然之
制稱職之美僉論歸之俄同判有大理寺有妖尼道安
者誣告庭列時諫議大夫張公去垂任京府判官實公
之外弟公抗疏請不預決讞詔即許之既法僚悉罹譴
黜好事者因定公雖避嫌疑猶涉黨援上惡其言不復
問收俾罷綸閣出知廣州求對清燕之間罄陳感戀之
誠今之此行非敢憚遠幸生還于京闕期瘁盡于國家
言發危心漼然泣下天子感動愍然久之且留公業又
不可詔遷職方員外郎以申獎任之意南粵舊拜邦為

一都會重溟伊邇蠻蜚之人雜居百貨所叢掌握之珍
可富控提封之五管嚴守府之萬兵公之至也閭里懷
思如得慈母堂皇決事號為神明朞月有成淳風萃于
殊俗異代相望清節邁于古人逾年就領廣南東路轉
運使寄任誠優風宜其異力耕火種田農之利益微草
伏木棲物怪之名斯衆跋履山川之巘道推行米鹽之
細務辨官屬之能否齊市賈之貪廉遠民悉安列國胥
化太宗祭前咎之無狀惜麟才之處外詔還且以為工
部郎中一日宸筆作飛白體書公及故禮部尚書張公
詠之名以賜相府詰朝二三執政進對上曰斯二人名
臣也卿頗知之乎左右曰或稱其才上大悅公既至即

拜樞密直學士與張公並命馬銀臺之制存乎李唐近代以來歸之樞府公嘗援引典故請更設一官局即詔與張公同領之上書之有六辭得以裁評施令之告四方此馬闋決出納無壅朝廷賴之陟降左右以益親從容言事而甚衆復有決公任廷尉日有博士國子皇甫偁掌無為權務以賅抵罪受其私禱為之末減事下憲府乃偁嘗寓題尺公不啟緘亟遣持去別詔即訊一介尚存納書竹中瘞于傳舍穿掘斯獲封識宛然飛驛以聞上驚嘆即時召見慰勞久之公頓首對以感會雖常雖死無報今此一節本畏人知飛語傍連乃至上達非遇覆盆之照將興投杼之疑詞直氣和上為頃聽心則

不競幾困於多言道之將行彌隆于乃春天其或者以是開之是月拜右諫議大夫日知樞密院事不旬日之間由外郎之秩遷權之速當世罕偕甫而見而拜趙卿未滿歲而得漢相用才之急從古而然惟公奮厲亨辰發舒盛業道合明主澤及生民許之三賢曾何足數時淳化二年秋季也至道初遷給事中真宗即位之始公適在假告力疾入謁得見東序君臣感咽悲不能勝徐奉慰安俾即親事進封戶部侍郎會濟陽曹王彬自鎮海節制入為樞密使以公為副西北二鄙烽烟未寧遣戍勞旋勇無于虛月代謀制勝爰在于中堂而公志本天然資略不世出為國遠慮咸有告于微言惟帝念功

薦或推于寵教咸平元年拜兵部侍郎叅知政事二年
冬羶裘犯塞草輅省方詔公兼知樞密院事壁壘朝行
儲胥夕舍出入延見靜動咨詢選將練兵戒器蒐乘機
事尚密率挿羽以馳書謀士或多殆躡足亟進計六羸
潛遁萬旅凱還天子以兩河之間綿及塞下師之所止
固荆棘之將生歲比不登念瘡痍之未起命公為河北
河西宣撫使黼惟飲饒昭瑞申諭蕃賜之錫莫非珍奇
仍以禁草萬人俾為衛從即邑相望凡數千官司肅給
車騎甚盛鳴笳清路百姓爭以縱觀持節勞軍諸侯不
敢仰視閭里之疾苦宣朝廷之恩德幼艾胥悅至于涕
零離去鄉里之眈得室家而競入跳梁山谷之盜投弓

矢而哀求乃至羗戎遺種城郭諸國聞公之至騷噪競
臻迎拜馬前或言吾父申嚴邊堠震壘天赦復命來朝
禮貌尤異明年三月以本官同中書門下平章事充集
賢殿大學士內則彌綸百度外則鎮撫四夷志勤勞于
邦家德光明于上下巖石之瞻斯屬鼎鼐之味惟和豈
勢高之易傾將功成而當去脩高宗僨田之訢頗致飯煤
之猜匪圖辨明深日劾責以戶部侍郎罷政事節踰年
出知永興軍府事未幾就復兵部高奴之壤保界一隅
控大宛善馬之來為天下勁兵之處屬羗酋之慕化因
彊吏以傳言輟我元臣綏茲異黨命知延州兼兵馬都
部署公作事謹始開心見成納其懷來許之即叙行險

徵倖固無爾從蓄疑敗謀適足自棄坎軻之言惟信庭
旅之貢甚勤戎索汜寧軍政增肅俄而陰山之虜盛秋
南牧呈赫斯怒盱食罷朝王于出兵宿食在野專以西
事委之于公密許從于便宜諸侯皆聽其節度調發次
補不俟奏可公再拜奉詔未嘗漏露外禦侮而有素坐
鎮俗以同常百郡幾乎不知四鄙終之無警公之定大
事得大體率此類也可勝言哉知河南府兼西京留守
屬圖建封被召歸觀六龍時邁以公東京留守司日畿
千里之廣宮鑰萬戶之嚴政務簡稀令行禁止善而無
迹天下稱之禮畢遷尚書右丞俄兼祕書監局禁凝嚴
盛開元之制度英髦雜集主東之文章天子以下武應

期嚮學篤化來金華侍講之舊躬石渠稱制之勤而公
兩朝柄臣上所尊禮思近著德樂聞話言即以為工部
尚書八政殿大學士屬有事于汾睢再命權東京留守
司禮成拜刑部尚書明年首夏以本官同中書門下平
章事集英殿大學士公本以平素于顯胥棄神靈之運
遂殘丞弼之嘗疑似之謗厥位惟危深思遲暮之年大
福不再而枚卜斯久輿誦益歸簡在上帝之心果為蒼
生而起真祖下暨渥澤其滂加拜中書侍郎譙毫修祀
加開封府儀同三司七年夏兼權樞密明年又詔權涖
馳道震方潛龍舊館自颺馭之昭格植珠庭而嚴奉摠
斯重事屬于台衡以公為景靈宮使僦工畢進位兵部

尚書感電之區考室底績命公為兗州景靈宮使慶成
奉冊推尊改元肆書典禮蔚縟瑞應紛綸授吏部尚書
天子推藝祖慶誕之方寔在洛宅擬漢家顧成之廟崇
建仁祠儼作繪之威神奉將行之儀衛以公為西京禪
院太祖聖容奉安禮儀使亦既復命劄奏避位援禮經
之將及奉恩詔之弗俞至于再三終不得請天子以公
耆明之德宜師長于百僚乃拜為右僕射康濟之術久
緝熙于皇極命兼門下侍郎鴻儒之才能就成于大典
俾之監修國史寵進之數率有加焉顧待之恩舉無與
對天禧二年充玉清昭應宮使首冠四輔奉承萬樞協
于友僚恢張法度之政惠此黎獻濟致仁壽之域啓乃
之論甚精毗予之託斯重終于哀疾晚于退休疊由表
願從還政丙命切至勉視事三年重陽節有詔近位
或集禁國公伸主禮以盡歡速暮景而罷會趨駕還第
言笑自若暴中風眩初若昏醒俄頃有瘳拜伏猶若中
使交道五返以宣言太鑿盈門十全而責效會就陽有
日公弗克侍祠禮成進位左僕射加昭文館大學士聞
命益懼削牘固辭詔以容禮交修謀猷有數苟守小遜
則非朝廷寵重宗臣臣下以自徇國之意宜即祇受無
煩重煩公不獲而陳但望闕頓首庚申歲旦疾勢驟加
湯劑並臻繼以鍼砭泣對傳詔手自封囊願達志誠乞
罷重任非敢受死寔恐辱國緣言荐降皆不垂允臨軒

軫慮形于顏色暮春三月風景恬和少覺體佳頗有戀
思因召門下士授席圍碁啜茗閑話及夕而罷比至中
夜疾不可起乃明日已歿以不起聞享年七十有二上
即時臨歿為慟再賜白金五千兩輟視朝三日冊贈太
尉中書令命入內省太常丞直龍圖閣馮元攝大鴻臚
持節職喪上又臨次發哀羣臣奉慰自小歛至掩壙內
司賓凡三至其第奉常考行謚曰文簡追祿嗣子遂及
諸孫傍逮姻戚之家下周給使之列即其年六月甲申
有司具鹵簿鼓吹塋我公于開封府縣汴陽鄉豐臺里
從先曹公之塋也公階崇三司爵冠五等封啟萬室號
登八字徽龍之教昌以加焉初娶安定梁氏封本縣君
再娶張氏封南陽郡夫人又娶廣平宗氏故檀狹使延
照之女封初國夫人後娶太原王氏故忠武軍節度使
同平章事道封秦王雷琦之女並風承宮教克著壺儀
輔佐宣勞奄忽流嘆生五子長曰傳正次曰傳亮並殿
中丞傳正賜緋魚袋次曰傳式次曰傳師次曰傳範並
大理寺丞三女長適金部員外郎李直方次適如京副
使王希範又次在室孫十人長大理寺丞賜緋魚袋繹
又次大理寺丞絳再次尉衛寺丞紳約綜再次大理丞
緯西頭供奉官純次大理寺評事緩綸維孫女八人曾
孫四人並幼公風度凝正識局淵深簡言易從官之以
信莊色難犯即之也溫不伐而功益高有容而德乃大

由布衣而作丞相自委質而至歸全出處不離于令色
屯夷不失于正道曠貴全盛凡四十年享用福履大臣
莫二始令君罷符離邑宰丁許公之憂生計屢空僦居
輦下惟公一子傍無近親偶得鮮原以營真宅俄有隱
者過而竊歎謂其後嗣當至公台豈英爽之崇已高天
之默定而青鳥之兆亦吉地之冥符釋褐臨州最號難
治刑清訟息吉人宜之亟升表著之班迭居要劇之務
身衢有漸淑問攸歸磅礴有邦遵疏重器執庭中之法
見君子用心慕委珠之名抗章辭設論入鎮秉酌泉之
節罷即無橐實之資密侍威嚴陪于前馬贊領樞務責
之坐籌屬戎埃之尚嚴講兵鈴之至衆朝奏暮召靡有
間時夜思晨行是稱盡力雅善敷納言必詣理方書簡
用進讀如流已事而還上為目送或問溫嶽更答他言
每下殿門更有常處山川曲折之狀畫地可成邊旁緩
急之機傳檄乃定際于隆洽預茲弼諧百志惟熙一德
匪懈深惟朝家之大策親贊帝者之上儀昔黃霸長于
治民及為丞相風采不及于魏功名益損惟公外守方
面流豈第之數內秉紀綱茂經綸之業謝公有廊廟之
量而不閑時畧惟公長轡遠馭幃幄而決勝輕裘緩帶
談笑以臨戎周勃之謹厚可厲而椎樸少文惟公言成
典謨學諛韜畧常以經義而進退好觀故事而奉行薛
宣之足以謀王體斷國論而煩碎不稱賢惟公持重有

威醇大成裕公府未嘗按吏部大夫各使任其職公孫
脫粟一肉賓客仰給衣食而性忌害外寬內深惟公致
位三事故舊不遺賦祿萬鍾自奉甚薄推轂荐士常若
不及虚心待物豁然無疑張安世匿名迹遠權勢而父
子封侯在位太盛家僮七百皆有手技以殖其貨惟公
子十有餘人在父之時無一釐務者祿賜之入猶畏盛
滿躬以清德率下化成傑然真王佐之才所以成天下
之務前後屢奉詔撰宗廟尊謚及皇帝徽號用文斯大
手筆事與穹壤相契矣自餘論著體大思精遺藁僅存
成十五卷齋閣岑寂挾策觀書數歲以來手抄唐史攷
攷讎校朱墨洞分感疾之前甫爾終帙筆法適勁自成

一家檢飭閨門教誨子侄曰嚴與敬極乎義方節訓在
家未嘗賜席石慶入里不敢乘車念肯高宗之為難諒餘
慶之斯在前歲屬疾涉于累旬徧召家人條約後事裁
置壽木寓置僧坊及此奄然終制已具達人夫觀其若
是歟惟其未報主恩不去相位垂緒言而在耳齋永恨
以入冥若乃務經大猷克庸祇德有庇人之惠也世之
量茲所謂巖廊肅哲之老社稷表幹之臣者也其一話
一言大功大行固已藏之王府載于國冊而諸孤等履
霜露而永感仰風烈之如存願紀豐碑以表幽隧爰奉
俞詔屬于下臣慙匪當仁庶于傳信其銘曰

天之氣清

地之德寧

大昴儲粹

維嵩降靈

新合嘉運

公之生兮

舜咨于枚

湯選于眾

出畋協卜

求野消夢

發舒盛業

公之用兮

懿行嘉言

休勛美利

文致太平

武嚴守備

知無不為

事二帝兮

七政以齊

五刑幾措

丹青神化

金玉王度

時惟老成

居元輔兮

其靜也專

其動也直

保茲一人

建呈建兮

剛亦不茹

柔亦不吐

式是百辟

遵公路兮

陟路巖廟

助和鼎鼐

如其天下

想風采兮

屹若崇山

湛如止水

終之宰相

自有體兮

池鳳方集

隙駒靡留

奄忽厚夜

生若浮兮

行將賜几

不獲歸印

凜然餘風

沒猶振兮

容車秘氣

袞服密章

送往無還

孝心傷兮

德音孔遐

緒言如在

翼傳子孫

令族大兮

梁臺高峙

浚波東走

真宅言歸

名不朽兮

國典禁樵

都人墮淚

穹石攸利

辭無愧兮

文正李公魏國太夫人符氏墓誌

李文正諱昉字明遠深州人
朝奉郎行右正言直集賢院同修起居注輕
車都尉賜緋魚袋祖士衡撰

士衡先娶禮部尚書李宗訥之女字大辯
所以知夫人符氏之詳

天禧二年歲在壬午閏四月癸卯故相國文正李公夫
人考終于京師崇慶里春秋六十有七天子以其輔佐
君子之勞幹理家政之德朝宮庭者踰于三紀啟國威
者歷于五邦淑問柔儀為命婦之表自屬纊以俟至專
道而行內司賓凡三至其第將祔之禮率有加焉存歿
之恩斯為至矣夫人姓符氏其先武都人後徙真定占

籍治產遂為北州之望族高曾而下皆隱德藏器用悔
居貞作善降祥自他有耀故殿中諱詞隴西李氏考妣
也故吏部郎中賜紫金魚袋宗訥太子右贊善大夫賜
緋魚袋宗誨翰林學士玉清昭應宮副使右諫議大夫
知制誥宗諤朝奉大夫國子博士宗諒子也適宮苑使
會州刺史滯御苑器械曹珣次早亡女也故國子四門
助教昭逸今太子中舍賜緋魚袋昭迪大理評事昭迥
故大理評事充宣化軍使昭適今大理評事昭遜太常
寺奉禮郎昭邁太常寺太祝刑部詳議官昭述三班借
職昭運太常寺奉禮郎昭邁進士昭道秘書省校書郎
昭邈太常寺奉禮郎昭適二未仕昭選昭逢孫也彭城

劉湛光祿寺丞潘承右西工閣門副使曹儀右正言直
集賢院同修起居注祖士衡衛尉寺丞錢延年孫壻也
一在室而亡三尚幼孫女也秘書省校書郎元卿次仲
卿季卿耀卿真卿堯卿舜卿正卿升卿晉卿曾孫也九
並幼曾孫女也夫人和順在躬幽閒成德始在孩稚天
資不羣沉靜寡言未嘗嬉戲因心則孝宗族稱之逮于
成人蔚為女士居玩圖史動守箴誨母氏鍾愛擇對未
行以燕婉之見求輒連蹇而不克時有識者知其貴徵
年二十六矣文正公任翰林學士承旨工部尚書始納
采馬先夫人即夫人之從姊伯姊也二姓好合永資繼
室之賢百兩御歸適協宜家之美一命受封武都郡夫
人明年文正公入齊祕殿乃贊中樞朞月之間正位宰
府夫人時疏封于曹國儷戎碩德嬪于清門朝夕執勤
聿成于闡範歲時稱慶遂冠于內朝而既富能裁在貴
思降寬裕謙約慈惠柔明比宗親待姉姪則以已下之
潔案盛澄酒醴則以身先之衣不同梳言無出闈五服
之戒中外實繁憧口往來盈門交道親疎有序榮悴不
移象用孟肥人以潛化為締為綵見功行之勤如山如
河知服位之盛每休澣晏集子婦佐饌兒童捧觴夫人
親舉案以致恭儼如賓而相待故當世言家法者稱李
氏馮洎文正公曳杖晨歌夫人帷堂晝哭哀有餘而盡
禮居無慮以免喪既而整飭閨庭率勵宗黨門內之治

不肅而成今上嗣統封許國太夫人始從子也自爾國
家再鼓柴于陽位肇秘玉于天封臨顧之祥荐膺于神
貺顯揚之澤用旌于母儀由是進改陳魯衛國號焉于
是愛子令孫懿親近屬或代言玉署通藉金閨納駟之
第通衢附貂之冠充帷垂青襲紫濟上誥上諸婦在旁
莫非甲族粉澤之鈿並列環佩之散相聞夏清冬溫克
伸于孝養出告反面匪遠于慈顏而自比部歸全翰林
淪謝曾未數歲戴宣化之忘慈念所鍾居多感泣平生
無疾未始晝卧今茲首夏常膳靡加涉手旬時遂成羸
瘠雖勉進醫藥而微瘳不言恬然反真如熟寐者易箒
之夕家老始告固已儲量人之財庀送終之其條約後

事咸有素焉豈知命之儻常何達生之如是博士君與
孝孫昭迥等即以其年孟秋甲申號奉靈輜歸葬于河
南府河南縣伊水鄉諸葛原與文正公同域而異壙合
葬非古得吉兆以在茲其生若浮惟芳猷之不泯嗚呼
夫人淑謹內積端厚外彰言無奇哀音志在節儉賓祭
之外靡事珍饈朝覲之餘不衣異綵賦性勤敏精力過
人自始笄至內外婦逾四十年率雞鳴而起盛服正容
暑雨祁寒無一日少懈服勞攻苦常夙夜而警戒問疾
弔喪必先往而後罷家有孤孺乃日鞠之推燥分甘無
所不至聞人為善必欲成就其身名撫不有恩未嘗假
其顏色若乃居春秋小君之重得易象中饋之宜脩內

則之齊莊窺女史之悅懌采蘋之循能度隱雷之勸以
義鍾夫人之禮郝夫人之法惟是數美無不兼之宜其
式孝慈于六親享康寧于五福著嚴君之家節播壽母
之頌敬方抱孫于高堂遽收神于太素蘭熏玉碎已嗣
徽于昔人石泐金生當取信于來裔恭惟先考諫議大
夫文正公自出士衡無狀又為夫人諸孫之壻周知尊
行欽奉緒言啣哀不及庶績實錄銘曰

其馨如蘭

比德如玉

終然允淑

出令族兮

長守富貴

能循法度

居中有助

嬪賢輔兮

表率命婦

肅且雖

允服盛容

啟國封兮

言惟婉柔

性本冲澹

國史是鑒

成閭範兮

生若夢幻

疾在膏肓

復常曰命

壽木減兮

疑尚如存

求則不得

孝心惻

思罔極兮

東望吾夫

北望吾子

卜葬于此

掩蒿里兮

刺介辭石

追美重泉

慈無愧言

表松阡兮

洛陽九老祖龍學文集卷之十五

洛陽九老祖龍學文集卷之十六

家集

提刑始末

朝奉大夫提刑福建刑獄公事兼本路勸農使提
舉河渠公事柱國賜紫金魚袋祖無頗贈宣奉大
夫

公諱無頗字夷吾喜讀書不事他好刺意為詩賦年十
一用父府君蔭補官試于京師其年用兄無擇為廣東
轉運使過嶺恩例秦乞家便授江陵府法曹移廣安軍
渠江縣令以廉幹稱改天平軍節度推官知福州寧德
縣簿書民事之暇讀書溫習寢食不釋卷會是年舉進

士鏢試中格迴改大理寺丞荆門軍僉判數月移知化州治平四年轉太子中舍又轉殿中丞尋監在京布帛轉國子博士通判登州時熙寧初役法行為管幹官轉虞部員外郎通判婺州攝治吳興郡元豐三年官制行換朝奉郎復轉朝散郎為九江守有治狀為朝廷所知俄被召權開封府推官三院獄空開封府尹王存上表稱賀賜公獎諭銀絹修城用夫役十餘萬人為專一都大提舉官元豐六年閏六月十三日公上殿奉修城事稱旨賜紫金謝恩當殿兩拜河決陽武會虜使亟至命公疊治道路無滄浸之患特減年磨勘朝請即除駕部郎中自陝西罷牧馬監其廢地多為民所占公奏請官

根括皆如公請復賜帛元豐八年公上疏為亡兄無擇安葬事乞補外任遂知潁州轉朝奉大夫移知邢州乞將合轉官永不改贈父止乞改贈兄官所請不行而竟不下磨勘就移提點利州路刑獄未通年以西京蔡州族屬口夥食貧乞宮觀以便撫恤授提舉西京嵩山崇福宮因盡散所有以給不足公居蔡日以松楸為事終宮觀任不離墳側靈芝又生墳者數本蔡人異之以為孝德所感秦觀紀述其事獎勵風俗尋授提舉點福建路刑獄諸州斷案有宜輕而誤重應出而誤入皆原情糾正不動州縣情輕者以減無辜者獲免屢司拜憲未嘗起獄以活時譽大抵明敏尤長于吏事其持已也嚴

其治人也。恕見于行，雖不為驚俗可喜之事，人皆知其中實而不華，行于政雖不為振衆可懼之法，人皆知其公正而不倚。自福建歸，元祐八年正月二十日感疾于杭，卒于杭州餘杭之江亭，享年六十有五。故死之日，無不嘆息，皆曰：天奪吾善良，其子球禮等扶護歸于蔡。紹興三年正月六日葬，從先塋也。初，府君嘗以蔡州土厚水深，可以為他日歸息之宅，乃囑其子：吾死當出祖於蔡，及沒至自鳳州，公與兄無擇能奉父之遺訓。寶元二年冬十一月，歸葬于汝陽縣西十里岡，定居蔡州。自此始矣。公有子七人，長曰琚，次曰球，禮過房在龍學。位曰玠，曰德孫，曰德恭，曰復，曰德彰，皆齒仕。版女二人，長

適奉議郎前知蘇州長洲縣李秬，次適承議郎尚書司勳員外郎陳并孫兒女二十人，逐位仕宦。南北經兵革之後，惟德恭位行于紹興辛巳歲，自蔡州歸，正近已見之。德恭，叔祖也。終朝議大夫知資州，賜紫金魚袋。紹興間卒，塋于川中富順監蔭補子孫四人，今在荆南府清溪居。

祖氏先塋芝草記

秦觀字少游撰

少游時為蔡州教官

大夫祖公無頗，自西蜀使者得請，以崇福祠官燕居于蔡。將送朝，謂高郵秦人曰：祖氏本幽州之范陽，晉將軍逖實我遠祖。其後稍徙深州，至道間始來居蔡。今汝陽

縣陽安鄉十里岡之源則我先府君之墓也元豐初有
芝數十本產于塋中其後歲亡有之迄今不絕夫豈一
氣之運偶然感發莫詰其所以然耶抑天時人事之際
或有以致之也予其為我記之觀曰草之有芝猶鳥之
有鳳獸之有麟從古相傳以為瑞物今乃歲生于先塋
之中者殆汝南和氣之應祖氏方大之祥其非偶然決
何以明之汝南在漢為佳郡陳蕃黃憲二許諸袁之徒
寔皆郡人俗尚風節輕勢士不守道則妻妾恥之故天
下號汝南為名士之區迨唐之世始建彰義節度屯宿
重兵而李希烈吳元濟秦宗權之屬盜有其地王澤不
流民眊無知父以弄兵詔于兄以殺人誨弟故天下號

淮西為盜之藪皇朝受命定都大梁蔡去京師七驛遂
為輔郡百餘年間良二千石接武而至興學校修貢舉
以宣布教化而盛德尊行魁竒俊偉之才相繼出焉蓋
唐之舊俗浸微而漢之遺風復起當此之時祖氏一門
顯者數人府君之從弟士衡掌誥掖垣子無擇通籍內
閣大夫踐更中外為省名郎作時膚使行且登用諸子
森然多有植立其慶未艾也由是言之芝為汝南和氣
之應祖氏方大之詳豈不信然昔新豐氏李興廬于父之
墓左有紫芝白芝二本生于廬上柳完元以為孝治神
化陰中其心克致斯事矧今芝出于股肱之郡侍從之
家也哉宜得一時文學之士比物屬辭歸美于上度為

為樂歌薦之舉廟追配元封齋房之篇觀也何足以與
于此姑承大夫之命論次其事以備作者採擇而已元
祐八年四月吉記至道年號是本朝太平末年

勅書一十三件

一

勅祖無頗省所進奉太皇太后皇太后皇太妃絹共一
千三百匹事具悉朕嗣膺景命祇奉慈闈眷言共服之
良來効貢珍之慶願惟忠藎深所歎嘉故茲示諭想宜
知悉秋涼汝比好否遣書指不多及

二十一日勅

二

勅祖無頗省所進奉賀登位銀三伯西事具悉汝蚤分
邦寄具帥朝契肆予泣祚之初爰有旅庭之貢載循順
節昌弭褒懷故茲示諭想宜知悉秋熱汝比好否遣書
指不多及

十一日勅

三

勅祖無頗省權知開封府王存上表稱賀三院獄空事
開封典治畿甸稱為浩壤獄刑之蕃其來舊矣汝協心
帥職罔罔空虚載惟公勤良以褒尚今賜汝銀三十兩
絹三十匹至可領也故茲獎諭想宜知悉

十七日勅

勅祖無頗朕摠擘政綱力求民隱蠹弊多辟各在一人
屬當暑令之行尤念囚繫之苦汝出外憂寄寅布化條
宜體朕之哀矜以効天之長育益思明謹無使苛留勅
書到日汝可速使揮渥飾洒埽獄房常須潔淨每五日
一度差人就獄內監逐人力刷湯枷杻及逐日供給水
漿魚罪人內如有疾病者立便差人看承鑿療其委無
骨肉者支與喫食有人供送茶飯者亦須晝時轉送不
得邀難減尅無使罪人或至飢渴所有合歸法者候處
斷之時給與酒食如小可罪犯便須逐旋決遣若是大
段刑禁事關人命亦須盡禮速行勘斷不得淹延致有
冤枉仍散下管內汝宜常切提舉無令曠慢及候依此
逐件施行訖聞奏想宜知悉夏熱汝比好否遣書指不
多及

二十七日勅

五

勅祖無頗朕臨御綿區輯和兆姓式屆長羸之序爰矜
庶獄之艱申飭攸司載懷歛恤汝職當寄任自奉詔條
宜察滯留益加明謹勅書到日汝可速指揮渥飾洒埽
獄房常須潔淨每五日一度差人就獄內監逐人力刷
湯枷杻及逐日供給水漿魚罪人內如有疾病者立便
差人看承鑿療其無人供食者官造給之有人供送茶

飯者亦須晝時轉送不得邀難減尅無使或至飢渴所
有合歸法者候處斷之時給與酒食如小可罪犯便須
逐旋決遣若有大段刑禁事關人命亦須盡理速行勘
斷不得淹延致有冤枉仍散下管內汝宜常切提舉無
令曠慢及候依此逐件施行訖聞奏餘依條制故茲示
諭想宜知悉夏熱汝比好否遣書指不多及

二十七日勅

六

勅祖無頗省所進奉興龍節功德疏一軸事具悉穰歲
會祥誕辰屬慶嘉一忠之體國薦萬壽之對天勝集妙
緣誼形善祝精誠彌勵欣歎良多故茲示諭想宜知悉

春暄汝彼好否遣書指不多及

九日勅

七

勅祖無頗覽所進奉坤成節功德疏一軸事具悉節紀
誕辰慶均率土集真乘之妙教演寶梵之洪音式將臣
子之誠同慶天人之祝眷惟忠恪良用歎嘉故茲示諭
想宜知悉秋涼汝比好否遣書指不多及

二十六日勅

八

勅祖無頗省進奉坤成節功德疏一軸銀軸頭事具悉
秋籥方更金行協應屬慈闈之盛德紀彌月之嘉辰恭

結勝緣祝延壽祉載惟勤至良厚褒稱故茲示諭想宜知悉春暄汝比好否遣書指不多及

二十二日勅

九

勅祖無頗覽所進奉坤成節功德疏一軸事具悉節屬誕彌慶均中外集三乘之妙教祈百順之休祥眷若忠誠良深嘉歎故茲示諭想宜知悉秋冷汝比好否遣書指不多及

二十六日勅

十

勅祖無頗朕惟教導之不篤俾無知之民橫罹罪罟方

夏繫滬纒繫狴犴朕甚憫之汝砥節首公出分憂寄宜務矜哀勿令慘澹以時視獄副茲欽恤之懷勅書到日汝可速指揮溼飾洒埽獄房常須淨潔每五日一度差人就獄內監逐人力刷湯枷杻及逐日供給水漿兼罪人內有疾病者立便差人看承鑿療其委骨肉者支與喫食有人供給茶飯者亦須畫時轉送不得邀難尅減無使罪人或至飢渴所有合歸法者俟處斷之時給與酒食如小可罪犯便須逐旋決遣若是大段刑禁事關人命亦須盡理速行勘斷不得淹延致有冤枉仍散下管內汝宜常切提舉無令曠慢及候依此逐件施行訖聞奏故茲示諭想宜知悉夏熱汝比好否遣書指不多

及

一日勅

十一

勅祖無頗代天牧民欽哉惟刑之恤司政典獄罔不惟德之勤官申飭于邦常以奉承于夏令萬方有罪孰非朕志之哀矜一夫回隅豈助物生茂豫肆吾孚號戒爾在官事無變于清明心必存于忠恕惟察惟法勿替朕言勅書到日汝可速指揮渥飾洒掃獄房常須淨潔每五日一度差人就獄內監逐人力刷湯枷杻及逐日供給水漿兼罪人內如有疾病者立便差人看承醫療其委骨肉者支與喫食有人供送茶飯者亦須畫時轉送

不得邀難尅減無使罪人或至飢渴所有合歸法者候處斷之日給與酒食如小可罪犯便須逐旋決遣若是大段刑禁事關人命亦須盡理速行勘斷不得淹延致有冤枉仍散下管內汝宜常切提舉無令曠慢及候依此逐件施行訖聞奏餘依條制故茲示諭想宜知悉夏熱汝比好否遣書指不多及

十五日勅

十二

勅祖無頗朕若古御國本天布化永念編氓之衆靡勝罹罪之繁屬炎鬱之正興在繫纒之良苦將導咸陽之德尚虞庶獄之苛稽有舊章特詔矜頒勅書到日汝可

速指揮渥飾洒掃獄房常須淨潔每五日一度差人就
獄內監逐人力刷湯枷杻及逐日供給水漿兼罪人內
如有疾病者立便差人看承醫療其委無骨肉者支與
喫食有人供送茶飯者亦須畫時轉送不得邀難尅減
無使罪人或至飢渴所有合歸法者候處斷之時給與
酒食如小可罪犯便須逐旋決遣若是大段刑禁事關
人命亦須盡理速行勘斷不得淹延致有冤枉仍散下
管內汝宜常切提舉無令曠慢及候依此逐件施行訖
聞奏故茲示諭想宜知悉夏熱汝比好否遣書指不多
及

二十四日勅

十三

勅獄者人命之至重也故刑罰不中則民無措所手足
方盛夏長養之時有司其蠲煩獄出輕繫以奉順天氣
夫以苛為察以刻為明豈勝朕所以哀矜之意哉勅書
到日汝可速指揮渥飾洒掃獄房常須淨潔每五日一
度差人就獄內監逐人力刷湯枷杻及逐日供給水漿
兼罪人內如有疾病立便差人看承醫療其委無骨肉
者支與喫食有人供送茶飯者亦須畫時轉送不得邀
難減尅無使罪人飢渴所有合歸法者候臨處之時給
與酒食如小可罪犯便須逐旋決遣若有大段刑禁事
關人命亦須盡理速行勘斷不得淹延致有冤枉仍散

下管内汝宜當切提舉無令曠慢及候依此逐件施行
訖聞奏故茲示諭想宜知悉夏熟汝比好否遣書指不
多及

二十八日勅

跋韓熙載夜宴圖

南唐中書侍郎韓公熙載後主時知國祚將廢放懷盃
酒間以自汙後主欲用為相而聞縱逸不檢每伺其家
宴令畫工顧弘中丹青以進其卷首即與公門生朱銑
紫微印綵狀元及教坊副使李嘉門并其妹按胡琴又
公自擊鼓妓王屋山舞六公王屋山俊偉非常公最憐
愛每醉須樂聒之乃醒幼令二婢出家號凝酥素質後

主復信小人之譖遂黜公以左庶子分司南京受命日
畫逐羣婢單車就路後主憐之留為尚書不數日羣婢
復集飲逸愈甚後主歎曰孤不得熙載為相矣既而薨
於私第後主泣之慟贈平章事謚曰文元豐己未孟夏
二十日洛陽祖無頗題

提刑第五子諱德恭字肅之乃德安府落雁朱少
師之孫壻頃于宣政間待晉州太守闕挈家寓居
安陸縣城北普光寺中與張紫金之孫字宣卿去
皆為親契因出葬賦挽詩令附于末云

德恭伏承制致政安鄉承事出葬有期不勝感
愴輒成挽詩三首以道追往之意范陽祖德恭

孝養人誰及清修少比倫旋聞丹旆具俄見軸車存空
 歎音塵遠猶思燕席温安然向窰窰感涕一銷魂
 清白傳家舊天鍾間世才大椿宜更壽喬木遮先摧難
 止交情淚空遺寶燭灰幽圻歸墓處恹々暮雲堆
 重歎張夫子神襟遠勿寧摧山傾嶽笑萎哲奄椿齡舊
 室惟圖像新阡乃克銘河堪聽訝挽埋玉在幽垆

洛陽九老祖龍學文集卷之十六終

洛陽九老祖龍學文集并源流始末

祖氏源流

上世幽州祖于范陽為著姓涿州三縣苑其後稍徙深

州而因家安平縣凡數世幽州南一百二十里至涿州南又一百二十里至深州倚

郭縣曰安平逮至皇朝曰諱仲宣仲偶者隨李丞相自深而

遷汴故相文正李公坊之壻則仲宣是也仲宣仕為都

官生侍郎諱岳貫開封府開封縣清和坊戶至道間始

來寓于蔡州仲偶遭除太祖拔擢為右輔闕廣南西路

轉運使與其子諱岳回居許州岳以宿骨為仙侍郎有

四子伯曰士良無祿早世仲曰士安登天禧三年進士

終銀青光祿大夫季曰士龍用弟士衡蔭補官終太中

大夫曰士衡狀元及第終知制誥

龍學始末

公諱無擇字擇之蔡州人王父尚書吏部侍郎諱岳父
銀青大夫諱士安公寶元元年進士第三人及第授承
奉郎通判齊州年餘召試充直史館次知南康軍海州
遷祕書丞廣南東路徙荆湖北路皆為提點刑獄加太
常博士直集賢院改廣東轉運使時廣源州蠻入寇陷
嶺外數州公提兵勦逐未舉移典袁州自慶歷詔天下
立學十年間徒為文具無命教之實公下車首建學宮
置生師郡國弦誦之風由此始盛召除同修起居注時
封孔子四十七代孫宗愿為文宣公公言前代所封在

漢魏曰宗聖在晉宋曰奉聖後魏曰崇聖北齊曰恭聖

唐初曰褒聖開元中尊孔子為文宣公是以祖謚而加

為文宣王遂封其後

後嗣非禮也于是下近臣議改為衍聖公尋奉使契丹
回數月出知陝州及湖北轉運使入為中書舍人魚宗
正寺修玉牒守判太府寺嘉祐六年富相奏舉天下遺
才詔從時王拱辰尹洙薦邵雍仁宗命公行詞次後公
與宰相吳充復薦之嘉祐八年假右諫議大夫充英宗
即位契丹皇太后國信使還見對以御書御篆四朝寶
字賜之仁宗虞主至自山陵英宗迎主集英殿公與諫
官官司馬君實奏請親虞下禮院詳以聞治平元年獻
皇極箴司馬君實獻戰國通志並賜詔獎之二年糾察

在京刑獄遷左諫議大夫加龍圖閣直學士知開封府
七月進龍圖閣學士知開封府其後出知鄭杭二州神
宗召知通進銀臺司初詞臣作誥命許受潤筆物王安
石與公同知制誥公為先進安石辭一家所饋以其物
置舍人院梁上安石憂去公性端毅以安石沽矯虛名
取為公用安石聞而怒之後安石出使江東多招士謗
公作書馳報可謂忠言安石答書其言怒益甚至是安
石當國家諭監司求公守杭之事監司承風旨採以妄
言聞于朝乃遣御史王子韶按治終無所得子韶知安
石意誣以送賓客酒三百小瓶蘇頌鄭解御使張戩等
皆上疏力言其不可是時公年六十不幸值安石專政

司馬君實堅辭求出公慨然乞分司提舉西京御史臺
與文潞公富韓公司馬溫公數君子為真率會洛中謂
之九老公分司十餘載神宗厭薄安石出于外元豐六
年復起公典藩賜玉帶方大用公卒矣時元豐八年正
月十五日士論惜之公為人好義篤于師友少從孫復
學經術從穆修為古文兩人死力求其遺本彙次之傳
于世以言語政事為時名臣槩見于史冊公平生所作
文甚多自西經兵革之後家藏并收拾止得十之三四
今集為十卷名曰煥斗集蓋取公出知陝府日歐陽永
叔踐行詩有曰西州政事藹風謠石掖文章煥星斗故
也又有名臣賢士詩與文兩卷附之公之叔祖諱岳為

神仙士衡為狀元紫微弟諱無頗為福建路提刑亦有
傳記勅書與文其侄惟有資州太守諱德恭者詩三首
共又作四卷亦附之公之妻叅政王舉正長女也連袂
梅堯臣韓絳李復圭范子開紹熙三年九月吉日曾孫
承直郎特添差袁州軍事判官仍釐務范陽祖行頡首
再拜謹題

洛陽九老祖龍學文集并源流始末終

右祖龍學文集十六卷典雅韞藉我 國朝太平之文
獻也苗裔有居合肥者貧不給饘粥能保此版不妄予
人獨欣然以歸其學其志可嘉尚已然版之脫亡二十
有九不能為完書雖得別本帑亡羨財弗克治故書目
僅存其名 國體懷茲久矣于是騰校刊補卷秩始備庶
幾以傳可遠亦先哲之志云紹定己丑十月既望郡文
學趙國體敬識于卷末

後跋

圖書

上海圖書館藏

